

■ COLUMNA

Viva, chara columna!

DA DAVID TRUTTMANN*

Cun la gasetta dad ier è cumparida la 25avla columna da quest onn. Quai è bain ina buna raschun per far ina giada in viva sin questa rubrica. Ed ina buna raschun per scriver «ina columna sur da la columna».

Da mes onns da lavurar Radiotelevision Svizra Rumantscha (RTR) sai jau ch'i vegniva fatg stediain festa per in'emissiuin bravamain veglia al radio, ils «Impuls». Trais exempels: Ina damaun dal schaner 2011 è vegnì emess e celebrà il 5000avel Impuls. Viva! Dal 2015 ha RTR emess e celebrà il 6500avel Impuls radiofonic. Viva! E gea, dal 2018 hai perfin dà ina turnea «Sin il viv» per il 25avel anniversari da l'emissiuin. Viva damai sin ils vivs Impuls! Las festas èsi da prender cura ch'ellas crodan.

Elas columnas? A la fin dals quintes èn ellas gea la versiun scritta dals «Impuls». – Nagin viva, no party, no fun! Perquai auzain uss il magiel sin la 25avla columna cumparida quest onn. Avant quellas èn cumparidas ils davos onns segir passa 5000 texts columnistics en questa gasetta. Da-



pi passa 23 onns, di per di, quasi dapi che La Quotidiana exista. Per regla sin la davosa pagina. Cun mingadi ina foto pli u main actuala dals auturs. Mingatant èn las fotos veglias ed ils texts frestgs. Autras giadas sutsura.

Cun l'emprim schluc da la party columnistica pens jau a columnas cumparidas e legidas ils davos onns. P. ex. quellas divertentas da Dumenic Andry, quellas polemicas da Leo Tuor, quellas finas da Maria Cadruvi, quellas rabiatas da Theo Candinas, quellas murdentas da Roman Caviezel, quellas feministas da Viola Cadruvi, quellas selvadias da Göri Klainguti, quellas dal rockadur Benedetto Vigne ch'oscilleschan gerundisond, u alura quellas d'Arnold Spescha che dattan perditga da la ritgezza linguistic-meteorologica.

Cler, igl ha era dà columnas nua ch'jau hai propri stuì ma sfadiar da legger, e nua ch'jau sun alura vegnì a la conclusiuin ch'i dat atgnamain mo duas variantas: Ubain ch'jau sun memia tup per chapir il text ubain che l'autura u l'autur s'ha manevrà en ina scrivonda che naging na chapescha. Gnanc el/ella sez/za. Sin quellas columnas prendain nus ussa gist in proxim brav schluc. Viva. E gist anc in schluc sin quellas ch'han grittentà uschiglio per x ina raschun. Viva.

Però adina è la columna stada in spievel grondius dal pitschen e grond mund rumantsch: varià e monoton, allegher e lungurus, mediocher e magnific, plat e precis, per rir e cridar ed apunta frestg e main frestg.

Egea, grazia ad ina columna d'avant intgins onns hai jau perfin emprendì d'enconuscher insatgi. Ma quai è tut in'otra istorgia. Viva. Sin in avegnir inspirant, chara columna.

* David Truttmann ha lavurà 15 onns tar RTR. Dapi quest onn è el schefredactor da la nov creada FMR Fundaziun Medias Rumantschas, ed uschia era cunresponsabel per la rubrica dals «columnas». Dal rest è el maridà cun in'antieriura columnista.